

道光己酉鐫

隱居通議

海山仙館叢書

隱居通議序

校正泯橐吟橐諸詩文雖強半元初著作然宋末篇章
往往有之若隱居通議則皆元時纂輯水村公之志益
可見矣公少負偉略於兵謀地利無不諳悉北來鉅公
名卿無不容其碩畫公亦抵掌而談思期一當以爲世
用迺南北混一時異勢殊公之志益決於隱哉夫仕則
見之實事隱則付諸空言隱不如仕也然仕莫盛於唐
虞之際水火工虞教養各一其職而不能相通周公制
禮作樂其訓誥見於尙書其諷詠見於雅頌而周易之

象必於居東之日孔子爲魯司寇却萊於祝其誅卯於
兩觀而六經之述必於轍環之餘則仕又不如隱也且
守故府之陳言執盈廷之聚論以爲持政之大端雖有
變通神明究弗敢稍逾尺寸何如著書立說孤行一是
故議理學也不惟朱陸相商而龍川學術議論可以蓋
一世而開千古議古賦也不惟綺靡無取而秦伯長江
山谷道院可以駕六朝而軼班左詩歌則駁彭淵材之
第三恨又以雙井與浣花竝驅文章則譏梁昭明之無
統紀且原毛穎於廬山九錫駢儷錄謝賈師憲小啟而

僉上之不浼於忠義經史辨忠肅公無後而史冊之失
攷於家乘大行爲德行之大靈星次社稷之功議天地
之有初識縱橫貴賤之義議南陽之形勢見輓輅羊裘
之風鬼神則謂神怪窈冥之事爲害道雜錄則於語默
中處之間爲量衡其間遺文軼事確有可傳而不載於
典籍者賴此猶存其一二大抵無所不議則無所不通
通天地人曰儒公真可謂通儒也已雖然公自贊有云
使展其霖雨之手固當忠君父而澤民物是隱又非公
之所得已也嘗讀公母揭太君壙志母紉縫兒講習迄

夜分或鷄鳴乃已嘗曰汝家世名儒吾望汝無失爲儒
也會權姦覆國三宮北遷母流涕曰噫無望矣則公之
成就蓋在於五晬遺孤之日而不在於家山北遼陽之
年也與子偕隱溯孟教者敢忘所自哉或曰身旣隱矣
何又仕於本州仕於延平乎不知大隱城市小隱山林
古之人已言之避世金馬門古之人又嘗行之委吏乘
田未可謂仕況寄其道於木鐸函丈之間以稍慰其淑
人素懷一行於豐而繼往開來身實任之矣再行於劍
私畱受業者二年世共尊之矣苟非羶慕於要津貽譏

於捷徑士君子何不可沾一命以自行其志哉今觀此
編蓋在宋亡之後而其敘述在於歸閩者爲多則公之
自視仍然隱居而已耳何汶汶者之不審也不審其志
而徇其迹則仕於昇平者爲賢哲仕於衰晚者爲庸愚
生際奕葉者盡爲守正遇值鼎革者盡皆枉道是以仕
論仕尙且弗得其志之所存矧仕而仍然隱者爲能論
其世而原其心哉

康熙丁未日躔大火之次裔孫凝謹識於水雲書院之
壽文堂

隱居通議目錄

卷一

理學

卷二

理學

卷三

理學

卷四

古賦

卷五

古賦

卷六

詩歌

卷七

詩歌

卷八

詩歌

卷九

詩歌

卷十

詩歌

卷十一

詩歌

卷十二

詩歌

卷十三

文章

卷十四

文章

卷十五

文章

卷十六

文章

卷十七

文章

卷十八

文章

卷十九

文章

卷二十

文章

卷二十一

駢儷

卷二十二

駢儷

卷二十三

駢儷

卷二十四

經史

卷二十五

經史

卷二十六

經史

卷二十七

禮樂

卷二十八

造化

卷二十九

地理

卷三十

鬼神

卷三十一

雜錄

隱居通議目錄終

隱居通議卷一

南豐劉 壘起潛著

理學一

儒者職分

儒者職分不在於作文而在於講學講學不在於章句而在於窮理窮理不在於外求而在於存心

道統遺論

自孟子推明道統見於七篇之末章其後韓文公作原道伊川公序明道皆承其意推明之而皆不能無遺論